



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

<b>Name of School</b>	:	YAN CHAI HOSPITAL NO.2 SECONDARY SCHOOL
學校名稱	:	仁濟醫院第二中學
<b>Name of Play 劇名</b>	:	菲達的故事
<b>Script writer 劇作者</b>	:	黃翰貞 (導師)

**Synopsis 故事大綱：**

一個依然存在著奴隸制度的國家，奴隸用勞力賺取水和面包，同時受到種種不公平的對待。Z7832 一出世便是奴隸，他跟隨過幾個主人都對他很差，在塔利斯已經聲名狼藉，沒有主人會用他，因此他唯有到別的地方找尋工作。在 Z7832 最落魄的時候卻遇上了一位自稱商人的托尼，托尼正好需要一個人幫他拿笨重的行李前往市中心—科爾尼亞，於是 Z7832 答應幫他拿行李，二人一同前往科爾尼亞。Z7832 在途中見識到外面的世界，他開始有了自己的想法，開展了他不一樣的生活...



**IMPORTANT NOTE** 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

## 序

【晚裡，菲達獨自在書房中寫書。】

Z (vo)：對唔住，原諒我可能會寫得唔好，因為我唔係好識寫，但係我好想將我嘅故事講比你聽，呢個係一個關於尋找自我嘅故事。

Z (vo)：我係 Z7832，一出世就係一個奴隸，係一件貨物，係別人嘅財產。爸爸係邊個，媽媽係咩樣，我全部都唔記得。我淨係記得，我喺塔利斯一個專門買賣兒童奴隸嘅地方長大，嗰度有好多同我差唔多年紀嘅細路 S8566 同 G9111 係我嘅朋友，我地都係被布洛克一手帶大嘅。由出世開始我地就被教育成為一個稱職嘅奴隸。直到我地 12 歲，我地就被當成一件貨物咁被賣到去唔同嘅家族做奴隸。



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

**第一場：兒童奴隸市場**

【一個時代不明古時落後的異樣國家，依然存在著奴隸制度。每個奴隸背上都有一個編號刺青。】

瑪：布洛克！

【奴隸市場主管出來】

布：（恭敬地）係？

瑪：上個月喺你度買嘅呢個細路偷懶唔做野！你仲話佢勤力？我要退貨！我要返 500 個金幣。

布：瑪麗亞夫人，你已經用左佢一個月，條數唔係咁計架啫...

瑪：咁幾多？

布：300。

瑪：400。

布：350。

瑪：好。比返你。

【布洛克把金幣交給瑪麗亞夫人，瑪麗亞夫人滿意地離開。】

【布洛克遞上一條毛巾給 S8566。】

布：抹下你塊面呀，唔該！

S: Sir 你信我！我好勤力無偷懶／／...只係天氣太熱，我坐低飲左啖水...

布：無人想知呀！我呢度訓練出黎嘅奴隸出曬名做得野，無一個好似你咁！你坐埋一邊唔好煩我！

【S8566 低頭坐到一邊。】

Z：S8566 你去嗰度係點架？

G：係囉！快 D 講比我地聽丫！



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

S：做野好辛苦！我唔想再去喇！

G：雖然做野係辛苦，但係至少有飯食。

Z：係呀！布洛克話好彩嘅話會有床鋪，氹得主人開心主人仲會比金幣我地。

S：但係做錯小小野就會比人鬧，甚至比人打，你睇下我手上嘅傷...

Z：咁可能係你今次遇到個唔好嘅主啫人...／／我好想快 D 有主人買我返去，我一定會做到主人對我嘅要求。

G：我都係！我想快 D 離開呢度。

Z (vo)：呢度就係我出世嘅地方——買賣兒童奴隸嘅市場，呢度環境好差，而且無足夠嘅野食，所以我地個個都寧願早日被賣出去，如果好彩 D 遇到個好嘅主人什至可能有被鋪...呢個就係我地呢班細路嘅最大願望。

布：S8566 過黎！

S：咩事呀 Sir？

布：上車，我送你去科爾尼亞。

S：下？點解呀？

布：科爾尼亞係大城市有好多有錢有權嘅人，科林先生係我相熟嘅朋友，係一個好好嘅主人，佢會比野你做。

S：但係...

布：你放心！嗰度係大城市，去到嗰度你就唔洗再做 D 粗重嘅工作，會舒服好多！

S：真係嘅？多謝 Sir！多謝 Sir！

布：快 D 去啦！我始終係睇住你大嘅，都唔想睇住你死架嘛！快 D 去執好你嘅野啦！

S：知道！

【S8566 笑著向眾人揮手道別】